

Tisarloxrnixrjia Sul Vaexr Maele Ber

1

¹ Ngo mel Barloxr a. Ngo, Xila nei Tixrmoxrtaexl yaa nr nel dax cirgo a, niul ddei Arbbor Arbosobo nei Seirpor Yisu Zidu dax hher ji dae Tisarloxrnixrjia zzi gga jiaxlhuixl gga ca mel leil xil vaexr gger. ² Niul ddei Arbbor Arbosobo nei Seirpor Yisu Zidu nia leil seirseir meixl gger lol nia, nia leil nixmox zzaso lol nia.

Yisu Jjixr Lei A Ca Leil Ser

³ Arzzi-nimar arzzi-nimo, nia ho bei ho Yisu leil ddarzzi dax, nia lei ho bei ho zzicarzzi leil perniar dax a, yel ngua cirleixr nr nor nia leil Arbosobo leil nawo gger. Eil ddei mel ngua bei mibbe arddeir a. ⁴ Nia mel yarzi goxr sol, ca lei nia leil bixr. Eine nga bbeixarnar, nael nia halae sser gex dae, Arbosobo leil ddarzzi doxr dae. Yel ngua Arbosobo ddei jiaxlhuixl cirddeir-hanga dax nia leil kuar gger dae.

⁵ Eine nga a mel ngua saexl, Arbosobo ca leil ser dae mel mel hoxr, yel nia Arbosobo ddei goxr ddei leil weix a goxr sol dae a dder Arbosobo ddei goxr gga ddir piar. ⁶ Arbosobo mel bbaehhex, yel ca nia leil ke a mel Arbosobo lei yar leil bei koxl xixl, ⁷ nia leil nael ngua dax cirgo a zzaso lol. Seirpor Yisu nei yarzi ddo tisir mel merlabbor adoxlle gga ca leil mia lol halcar, Arbosobo dder eine bei du a. ⁸ Arbosobo yar leil nr saexl su nei niul ddei Seirpor Yisu leil biar dae ddar seirseir eil mel leil no-nr-ni su ca mel leil faxr lei. ⁹ Arbosobo yaa leil faxr lei a mel, yaa niul ddei Seirpor Yisu dax bbe kae nia, yel yaa murgurgurmo ddoddomo bei ggie mia nr ddo, yoxl yaa cirse-cirsil lei goxr sol gaxzi a. ¹⁰ Yisu lei hal cir ni mel, Arbosobo ddei cassor-worssor mel yar leil bbeix zae gger nia. Yisu einezeixl bbobbolbbo zza a, yar leil ddarzzi su ca mel xiar lei xiar nr ci.

Nia ngua bbeix gger ddar mel leil ddarzzi a, yel nia ca eil mel dax cirgo a hher dae a yaa sael a eine bei nia.

¹¹ Eine nga a ngua cirleixr nr nor nia leil Arbosobo dax ddar biar gger. Arbosobo mel nia leil tiur a, nia bei dae mel Arbosobo dax nixmox lodda lol; halae yar yarzi ddo a, nia seirseir xiar dae mel nei yar leil ddarzzi a bei dae mel lei bei cexr lol. ¹² Yel Seirpor Yisu middux a; nia lei middux a. Eil mel mel niul ddei Arbosobo nei Seirpor Yisu Zidu nia leil seirseir meixl gger a eine bei arddeir a.

2

Arbosobo Ddei Lixlfaxr Cirdoxr Lei No-Nr-Ni Ca Te

¹ Nael arzzi-nimar arzzi-nimo, niul Seirpor Yisu Zidu jjixr lei nei niul yar dax cirgo a hher dae ddei leil biar ci a mel, ² ca mel bbeix “Seirpor jjixr lei ho a,” eine bbeix a. Ca mel bbeix, ddar eil qier Arbosobo ddei Xiu yaa leil bbeix gger, xiezi bbeix gger, bbeixsael ngua xil vaexr gger eine bbeix a lei, ngua nia leil quex, nia ddarzzi nr ddo, zoxrzixr nr ssa. ³ Yaa arsae bbeix zzorbbeixlei, nia leil fur lol nr ddo. Yisu jjixr lei nixixl hal ddei ci xilmeir mel ca mel Arbosobo leil daxlgaxl dir, halae Arbosobo ddei Lixlfaxr cirdoxr lei no-nr-ni ca hal ddei ddux lei. Yar mel dder cirse-cirsil Arbosobo dax bbe kae nia. ⁴ Yar Arbosobo leil dir, ca mel arddolyox leil zi a lei yar yaa leil dir, yar leil lar zi lol. Yar armael zzir dae a yar bir Arbosobo nei ca zi dae cirza-hanga leil lei vaer leixl. Yel yar halae Arbosobo ddei xi gga cux dae a armael mel Arbosobo a eine bbeix.

⁵ Eil zzu mel ngo nia dax halmaex hher dae seir dder nia leil bbeix gger goxr a; holbbaexl nia hol-nr-cir a ngo? ⁶⁻⁷ Nixmox neix su mel arjjiuljjiu a ca mel leil Arbosobo ddei ddar nr no lol dae ho a. Nael yaa leil bbiur gex su ddei bbiur gex doxr dae a, Arbosobo yar leil bbiur nr gex lol ssi du si

hane zzezze bbiur gger ci. Nia saexl, eilleix arseir Arbosobo ddei Lixlfaxr cirdoxr lei nr no su ca hal te leil nr ddux lei lol bbiur gex dae, yel Arbosobo xiar har nixixl hal ni ci a saelnei ca hal te ddux lei cexr. ⁸ Bbiur gex su ddei zeixleixr bbiur nr gex a Arbosobo ddei Lixlfaxr cirdoxr lei no-nr-ni ca hal te ddux lei a. Arddolcar a Seirpor Yisu jjixr lei a yar meir gga seixl mel sser a, ca hal te leil bei zil gger; Yisu bbobbolbbo lei a, ca hal te dder mier a. ⁹ Ca hal te lei a mel, Sardaxl te yar leil ddo lol, yar cirza-hanga ddoddomo murgurgurmo bei var. Nael yar bei dae mel cirza-hanga lei yarjiar. ¹⁰ Halae yar cirza-hanga yarzi gexrddo bei a dixlyuxl gga zei nia ca hal mel leil fur. Yar fur wo ca hal mel mel Yisu ddei ddar mel no nr yuex, yel yaa leil dder jiuxl wo nr ddo. ¹¹ Yaa eine bei a mel Arbosobo dder yaa leil fur wo lol, yel yaa nga-nr-zi hal mel leil ddarzzi, ¹² yel Arbosobo dder Yisu ddei ddar mel leil ddar-nr-zzi nei nr hoxr mel leil bei meixr su ca maelmaerjjia leil faxr nia.

Yisu Leil Ddarzzi Su Mel Hhel Nia

¹³ Nael Seirpor perniar dae arzzi-nimar arzzi-nimo mel, Arbosobo mel merlo-milo bei beil car a dder nia leil tiur ho a. Yar ddei Xiu ddei nia nixmox gga hher dae a nia leil seirceix-seirmaer loxr lol nei nia leil Yisu ddei ddar mel leil ddarzzi lol a nia leil jiuxl wo lol. Yel ngua cirleixr nr nor nia leil Arbosobo leil nawo gger mibbe. ¹⁴ Ngua nia leil ddar seirseir mel biar gger a, Arbosobo nia leil tiur a nia leil Seirpor Yisu Zidu sael a middux lol. ¹⁵ Arzzi-nimar arzzi-nimo, nia hhel nia. Ngua nia leil mul gger dae ddar mel ngua bbeix teixl lei bbeixsael ngua sul vaexr teixl lei zzorbbeixlei, nia noni nia.

¹⁶ Niul ddei Seirpor Yisu Zidu nei Arbbor Arbosobo niul leil perniar niul leil seirseir meixl gger a, cirse-cirsil nia leil nixmox zzaso lol nei nia nga loxia dae mel yarzi loxr lol; ¹⁷ yar nia leil nixmox vaer lol nia, yar nia leil azo bei, azo bbeix lei yarzi seir lol a nia leil hhel du lei lol nia.

3

Zzicarzzi Leil Arbosobo Dax Ddar Biar Gger

¹ Nael arzzi-nimar arzzi-nimo, nia ngua leil Arbosobo dax ddar biar gger la. Yel Seirpor Yisu ddei ddar mel leil nialngasael biar kae lol, si leil lei noni lol, hherdder nia noni dae mel sael a nga. ² Ca mel cirddeir-hanga lei Yisu leil ddarzzi nr nga. Yel nia ngua leil Arbosobo dax ddar biar gger la a, nixmox neix a yarzi gexrddo bei su ca mel ngua leil bei vuxr-nr-yixr lol.

³ Nael niul ddei Seirpor Yisu ddei mel azo bbeix a mel azo bei, yar nia leil hhel du lei lol var, nia leil guaxr dae var, yel nixmox neix su hal te nia leil bei no gger nr var. ⁴ Seirpor nia leil ngua miardal dae mel sael a bei dae lol, arddolcar lei nia leil bei doxr dae lol var ngua ddarzzi. ⁵ Ngua Seirpor leil qie a nia leil Arbosobo nia leil perniar nei Yisu Zidu arsaesael ssertexr zza saexl lol nia.

Bbaeyo Nr Ddo

⁶ Nael arzzi-nimar arzzi-nimo, ngua Seirpor Yisu Zidu ddei mi ddei bbeix dae a nia leil miardal, ha Yisu leil ddarzzi su ca arddol ddei piasi-pialoxrmo, ngua nia leil mul gger dae mel sael a nr bei a mel nia dder yar dax naer nr ddo. ⁷⁻⁹ Ngua nia dax cirgo a hher dae seir car, ngua mel bbae dae nr nga. Ngua bbae dae a si ddei zzor nr nga, ngua yarzi sulku, merxixl merni lei miar bei dae a, nia leil maxr-nr-faxr. Ngua nia leil ngua leil guaxr nia bbeix cexr bbeixarnar, ngua nia leil nr bbeix. Ngua eine bei a mel, nia leil ngua dax bei mae dae lol niazzir. Nia saexl, nia ngua dax bei mae dae mibbe. ¹⁰ Ngua nia dax halmaex hher dae seir car a dder nia leil miardal goxr a: “Arseir miar nr bei a mel yar dder zzor nr ddo.”

¹¹ Ngua bbejjiur a bbeix, nia ca cirmelmel a bbae dae, miar lei nr bei, halae si ddei cirza-hanga guaxr meixr. ¹² Nael ngua Seirpor Yisu Zidu ddei mi ddei bbeix dae a ca eil mel leil miardal, zabbar seirseir a miar bei nia, armael mu wo mel zzor nia.

¹³ Arzzi-nimar arzzi-nimo mel, nia zabbar seirseir a bei doxr dae nia.

¹⁴ Ngua xil vaexr dae ddar eil zzu leil no-nr-ni su ca zza arddeirnga a, nia dder fadae nia, yar dax naer nr ddo, yel yar leil seixlda lol nia.

¹⁵ Nael yar leil nia leil vuxryixr su ca i mal gger nr ddo, yar leil arzzi-nimar arzzi-nimo leil quex sael a quex nia.

Barloxr Tisarloxrnixrjia Su Ca Mel Leil Seir Lol

¹⁶ Seirpor Yisu mel ca dax toltor a bei su ddei nga a. Yar leil nia leil arddolcar a lei ciryoxr-hanga zzazza-soso a zza lol nia, yoxl yar leil nia ca maelmaerjia dax cirgo a hher dax dae lol nia.

¹⁷ Ngo mel Barloxr a; ngo nia leil zzasoso dae biex ddar eil qier mel ngo armael vaexr a. Ngo ddei xil maelmaerjia leil lei eine vaexr a hoxltexr bei dae.

¹⁸ Niul ddei Seirpor Yisu Zidu leil nia leil seirseir meixl gger lol nia.